

# 《佛說普賢菩薩陀羅尼經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 20, No. 1127

## No. 1127

### 佛說普賢菩薩陀羅尼經

西天譯經三藏朝散大夫試鴻臚少卿傳教大師臣法天奉 詔譯

歸依普遍虛空界 三世清淨平等因  
性等法光正覺道 變化人天利樂身  
示居十地自在位 行大施願度眾生  
功德相嚴名普賢 今說真言祕密教

爾時普賢菩薩摩訶薩。欲現廣大變化而入三摩地。名三界大自在。入此三摩地已。從清淨虛空界。現無數身猶如塵沙。普遍大千一切世界。

爾時一切佛刹所有一切如來。舒其右手摩普賢菩薩摩訶薩頂。讚言善哉善哉佛子。汝今當說一切佛母最上陀羅尼法。爾時普賢菩薩。身放千光普照十方。一切佛刹悉皆震動。即說陀羅尼

怛儻也(二合)他(引)唵(引)曩謨(引)曩摩娑怛嚩(二合)部嚩儻(引)濕嚩(二合)囉摩賀(引)部(引)誑(引)野阿三摩三摩阿彌哆娑摩阿難陀娑摩誑誑曩娑摩怛里(二合)娑嚩娑摩(引)尾(引)沙娑摩波囉摩(引)囉他(二合)娑摩娑嚩(二合)婆(引)嚩娑摩怛他(引)誑哆娑摩阿囉惹娑摩輸弟娑摩沒馱娑摩達里摩(二合)怛他(引)誑哆(引)娑摩僧賀尾沙摩娑摩噫迦曩野娑(引)誑囉尾輪馱(引)路(引)迦呬呬羅沒馱(二合)羅沒馱(二合)尾惹野尾惹野暗(引)鉢囉(二合)設訖哆(二合)曩野(引)曩野憾啣囉(引)地瑟吒(二合)曩三部(引)誑暗娑曩(引)羅野(引)羅野達里摩(二合)引)誑囉(二合)馱囉馱囉惹野惹野吽吽馱摩馱摩娑嚩(二合)引)賀(引)

爾時普賢菩薩摩訶薩。說此陀羅尼已。佛即觀彼菩薩之身。是過去先佛。為悲愍一切眾生現變化身。滿於三界諸世間中。爾時諸大菩薩。及天人阿修羅等。從一切金剛峰起。離自金寶莊嚴大富貴座。來菩薩前而自唱言。南無大慈大悲無邊大功德海最上成佛大陀羅尼法。善能饒益過去未來現在三界無數眾生。令得安住大法之位。佛言若人聞此大陀羅尼法。經無邊劫所作之罪皆悉除滅。亦能枯竭煩惱大海。摧壞我見高山。譬如有人見百千佛。經無邊劫所作善根。亦不能及此真言功德。此大陀羅尼是一切如來心圓滿大功德海。而能出生菩提智種。成就一切智地。而諸佛法皆不能及。此大陀羅尼名號。假使百千那由他俱胝劫亦難得聞。若有人於此經典。受持讀誦恭敬供養。彼等眾生善解總持。能活慧命住如來位。成就一切功德。若有人讀誦此經。一遍二遍乃至三遍。彼人得最上功德。能滅一切罪能斷一切煩惱。復得值遇諸佛如來。不受一切憂愁苦惱。若於寂靜之處獨樹之下。一心持誦。彼人獲得一切成就之法眾所愛

敬。若有人於大林野結跏趺坐。誦此經典滿於七邊。彼人不久得大禪定。斷一切煩惱。復得普賢菩薩結跏趺坐而現於前。若人隨自力分以香華供養誦此陀羅尼。乃至困臥睡眠。於其夢中見普賢菩薩。舒其右手放法光明。灌照身心作如是言。善哉善哉佛子。如來大曼拏羅轉身。而得大菩薩位。身心安樂。具大福德智慧。常得見於普賢菩薩摩訶薩。若人以慈悲心。為一切眾生讀誦此經。彼人得十波羅蜜圓滿。滅除一切煩惱罪垢。復得天人衛護如來讚言。佛子汝若依行。不久當入普賢之地

佛說普賢菩薩陀羅尼經